

Parik Iri Shup Douk Jon Nenekap Iri

Banenyi Baraen Um Enyudok Baraen Jon Narik Neneken Iri
1:1-4 Jon nakripesh Iruhin ananin baraen aria neshuhur um shunadudareh.

1:5—2:29 Iruhin anan douk natrugun abom iri. Aria apak ta mupe bogaragun um, um agundok munek yopihi aih aria urkwip punawasham ihishmorim arpesh um.

3:1-24 Apak douk mape Iruhin ananish batowish. Aria douk apak ta urkwip punawasham apakish ashukenyish owashish. Aria shenek yoweishi inahos iri arpesh douk Satan ananish aria shape shenek yoweishi inahos namudok atin.

4:1-6 Apak ta munek skelim ihishmorim arpesh aria mudukemesh um eshesh Iruhin ananin Mishin nyapenyesh aka Satan ananin nyapenyesh.

4:7—5:21 Iruhin neshopoki ananin Nuganin nanaki agundok atap um nuyabigap ehudok aih um urkwip punawasham arpesh um. Apak ta munek bilip um anan aria mutukur anan atun um nunekap mupe wosik abom ihih nyumneh.

Krais Anan Douk Baugos Um Arpesh Shupe Wosik Abom Ihih Nyumneh Um

¹ Apak menekumep baraen apudok shup aria makripep um anudok arman douk nanahwar um Baraen iri. Anudok arman Baraen, arpesh douk ta shuran shunek bilip aria shupe wosik abom ihih nyumneh. Seiwok sagomatin watak baugos um anudok arman Baraen douk nape. Aria apak douk memnek um agundok anan neyagwreh um

aria matrui apakis nabes. Adur apak douk matrui aria masuhwan apakis wis. ² Anan douk natogur yopugunum aria matrui. Aria apak douk meyagwreh adurin atin baraeu um anan aria makrip ipak um anan douk baugos um arpesih shupe wosik abom ihih nyumneh um. Seiwok nani Yain hape aria douk natogur yopugunum matrui. ³ Apak douk matrui, memnekan um neyagwreh um aria douk makrip ipak shopunek. Makripep um ipak puni apak mupe atugun abom musuhw atin. Aria apak muni apakin Yain Iruhin nini ananin Nuganin Jisas Kraisi mupe atugun musuhw atin. ⁴ Apak mowem enyudok baraeu um apak muni ipak ta munadudareh abom muriguk.

Apak Ta Mupe O Murahaen Bogaragun Um Atugun

⁵ Enyudok baraeu douk apak memnekan nakriyen iri douk enyudok douk makripep-umen. Baraeu enyudok. Iruhin anan douk kabi lait um. Yopuyopun abom aria madae karowihi um anah arukwutigunih aih hupenyau um, aria ta mare nenek enesh yoweishi inahos uwe, uwok meyoh. ⁶ Aria apak mukri apak mani Iruhin mape atugun masuhw atin, aria abudok nyutob apak mupe arukwutigun um agundok munek eneshenesh yoweishi inahos um, namudok douk munek rohwi. Madae mugipesh adurin atinyi baraeu uwe, uwok. Aria enenyenen mape meneken iri madae adurin uwe, uwok. ⁷ Aria ta apak murahaen bogaragun um, um agundok munek enenyenen yopunyi kabi anan nape bogaragun um yopun abom um, namudok adur apak mape atugun masuhw atin abom. Aria ananin nuganin Jisas ananibor owishibor bakrup apakiruh aparuh aria nenekap matogur yopupari madae enesh yoweishi inahos shupenyap uwe, uwok.

⁸ Aria apak mukri apak eneshenesh yoweishi inahos uwok enesh shupenyap um uwe, namudok douk

munek rohwa abom um apak kanak. Munek rohwa aria adurinyi baraden douk madae enen nyupenyap uwe, uwok. ⁹ Aria ta apak muwerek eneshenesh apakish yoweishi inahos mukrip Iruhin um, anan douk yopini aria ta nugipesh ananin adurin atinyi baraden seiwok nakriyen iri. Ta nunek yopinyi mour abom um nukweshih apakish yoweishi inahos aria nugabeyap nunekap mutogur yopishi arpesk abom. ¹⁰ Aria apak mukri apak madae munek enesh yoweishi inahos um uwe, namudok douk makri Iruhin anan napeum nenek rohwa iri. Aria ananin baraden douk madae nyupe apakiruh aparuh uwe, uwok.

2

Krais Anan Douk Yopuni Nataurum Apak Abom Iri

¹ Ipak eikipari douk pape kabi eikish batowishumori, eik urkum manawashamep iri. Eik yenekumepogu baraden apudok shup um putrup aria mare punek enesh yoweishi inahos, uwok. Aria ta apak enen arpen nyunek enesh yoweishi inahos um, aria apak douk wosik anan nataurumap iri douk narig Yain um Yain nenek gihaumap. Anan douk anudok yopuyopuni abom arman Jisas Krais.

² Krais anan kanak nagok aria nenek Iruhin madae juwehosin um yoweishi inahos apak menekesh iri uwe, uwok. Nakwreyeshuguk nakri nyenekesh. Enyudok mour douk madae nuneken um nutaurum apak atup uwe, uwok. Neneken um nutaurum ihishmorim arpesk shape agundok atap iri.

³ Aria apak mukri mugipesh Iruhin ananin lo um, namudok douk mudukemesh abom namudok. Apak adur madukeman wosik abom um Iruhin. ⁴ Aria enen arpen nyukri enyen wosik nyadukemesh um Iruhin wosik, aria enyen mare nyugipesh ananin lo um uwe, namudok douk nyenek rohwa. Aria adurinyi baraden douk madae

nyupe enyenyihw apahw uwe, uwok. ⁵⁻⁶ Aria arpen douk nyugipesh Iruhin ananin baraen iri, enyudok arpen douk urkum manawasham Iruhin abom nyeshagrakuk riguk nyarik urkum manawashaman um. Aria enen arpen nyukri enyen nyani Iruhin nyape um, aria enyen ta nyunek eneheneh yopihi aih kabi Jisas Kraiss nenekeh iri um. Douk munekesh namudok aria ta mudukemesh mukri apak adur matukur Iruhin mape.

Arpesh Urkwip Panawasham Esheshish Arpesh Iri Douk Shape Bogaragun um

⁷ Eikish arpesh, enyudok lo yenyemagu um ipak iri douk madae enen namunyi uwe, uwok. Enyen douk watak sagomatin paraen iri. Enyudok lo enyen douk enyudok baraen ipak seiwok pemneken iri. ⁸ Aria enyudok lo douk yenyemagu um ipak iri douk namunyi. Apak douk matik abom Kraiss nagipeshen wosik. Aria ipak shopunek namudok pagipeshen um kupaishi shutrip. Um maresh? Douk arukwutigunih douk hakri hunak huwishuk aria adurit lait douk tatogur tape.

⁹ Aria enen arpen nyukri enyen douk nyape agundok lait tabuh um, aria enyen douk nyekenjuk agab enen enyenyin arpen um, enyen douk watak nyape arukwutigunum. ¹⁰ Aria arpen douk enyenyim urkum manawasham enen enyenyin arpen iri, enyen douk adur nyape agundok lait tabuh um. Namudok aria enyudok arpen douk madae enesh yoweishi inahos shupenyen uwe, um ta shuneken nyunek yoweishi inahos iri, uwok. ¹¹ Aria enyudok arpen douk nyekenjuk agab enen enyenyin arpen iri, enyen douk nyape arukwutigunum. Enyen nyape nyarahaen arukwutigunih atih aria madae nyudukem um agundok douk enyen nyanakum

uwe, uwok. Um maresh, arukwutigunih heneken aria madae nyutrugun wosik uwe, uwok.

¹² Ipak eikish arpesch douk pape kabi eikish batowish-umori, Iruhin anan douk urkum morum agundok Kraish nagok nator apak um aria anan madae nusuhwesh nupe um yoweishi inahos apak menekesh iri uwe, uwok. Nakwreyeshuk. Douk namudok aria eik yenekumepogu baraan um apudok shup. ¹³ Ipak douk kabi eikim arhim-umori, ipak padukeman wosik anudok arman douk seiwok wata sagomatin baugosum nape aria douk watak nape iri. Ipak weroroimi armam, ipak douk pabouk Satan nabuhuk. Namudok aria eik douk yenekumepogu baraan um apudok shup.

¹⁴ Ipak batowish, ipak douk padukeman wosik apakin Yain. Namudok aria eik douk yenekumepogu baraan um apudok shup. Ipak arhim, ipak douk padukeman wosik anudok arman douk seiwok wata sagomatin baugos um nape aria douk wata nape iri. Namudok aria eik douk yenekumepogu baraan apudok shup. Ipak weroroimi armam, ipak douk wosik dodogowip um agundok ipak madae punek yoweishi inahos um uwe. Iruhin ananin baraan adur nyapenyep aria ipak pabouk anudok yoweini Satan nabuhuk. Namudok aria eik douk yenekumepogu baraan um apudok shup.

Apak Ta Mukehuk Agabus Ehudok Atapihi Yoweih Aih

¹⁵ Ipak mare urkwip punawasham yoweih eneheneh agundok atapihi aih hani eneshenesh shape agundok atapihi iri, uwok. Aria enen arpen urkum munawasham yoweih eneheneh agundok atapihi aih um, aria enyen douk madae urkum munawasham Yain uwe, uwok. ¹⁶ Apak douk madukemesh. Ihihmori yoweih aih douk agundok atapishi arpesch ihih nyumneh mishish shakitak um

shunekheh iri douk ehudokmori. Shatik eneshenesh eshudok mishish shakitakumesh um shunek yoweishi inahos, shatik kupaishi eshudok shanawash-umesh, shanagunukuk um esheshish sabaishi eshudok eneshenesh um. Ehudokmori aih douk madae Iruhin nukepeh uwe, uwok. Ekeh douk agundok atapihi abom aih. ¹⁷ Agundok atapani eneshenesh douk arpeshe shapeum shatrish mishish shakitakumesh aria shanawash-umesh iri, eshesh douk ta shunak shuwishuk. Aria eshudok arpeshe douk shugipesh Iruhin ananim urkum iri, eshesh ta shupe ihih yumneh.

Jisas Ananin Horin Douk Natogur Jurug

¹⁸ Ipak eikish arpeshe douk patogur kabi eikish batowish-umori, hagiguk abom iri nyumnah douk hurukatin um hutogur. Riguk douk pemneken baraan um Kraisa ananin horin ta nutogur. Aria Kraisa ananish horim, douk shatogur sabaishi. Namudok aria madukemesh um, hagiguk iri nyumnah douk hurukatin um hutogur. ¹⁹ Eshudok arpeshe douk shakutup-ukuk. Aria riguk douk shanaki sheirap obi nyutob, abudok nyutob shopunek madae apakish abom uwe, uwok. Douk apakish abom akure, douk ta shuni apak abom mupe. Aria shakutup-ukuk aria madukemesh abom um eshudok ihishmorim arpeshe douk madae apakish uwe, uwok.

²⁰ Aria Kraisa douk nakapari Iruhin ananin Mishin nyabuhi nyawishep aria ipak ihishmorim douk padukemesh um Iruhin ananin adurin atinyi baraan.

²¹ Eik madae inekumepogu baraan apudok shup um Ikripep enen adurin atinyi baraan douk madae pudukemen iri uwe, namudok Uwok. Ipak douk padukemen enyudok adurinyi baraan. Aria douk shopunek Padukemesh um adurinyi baraan douk madae nyugremen atin uwe rohwinyi Baraan, uwok. Namudok aria douk yenekumepogu baraan um apudok shup.

²² Arpesh douk sheneyagwreh rohwinyi baraan iri douk meishi arpesh? Eshudokmori arpesh douk shakri Jisas anan madae Kraiis uwe, douk Iruhin nagraehan aria neshopokan nanaki iri uwe, uwok. Eshudokmori arpesh douk shakanuk agabus apakin Yain nani ananin Nuganin. Aria namudok douk shatogur Kraiis ananish horim abom. ²³ Meishi arpesh douk shukon agabus Nuganin iri, eshesh douk shopunek shakon agabus Yain. Eshudok douk shukon aparuh Nuganin iri, eshesh douk shopunek shakon aparuh ananin Yaken.

Iruhin ananin Mishin Apa Nyeyabigap Adurinyi Baraan

²⁴ Enyudok baraan douk riguk wata sagomatin pemneken iri, ipak douk pusuwen dodog abom ipakigos baragos. Aria pusuwen dodog abom namudok um, ipak ta putukur nuganin nini Yaken ihih nyumneh. ²⁵ Aria Kraiis anan kanak douk nakripep enyudok adurin atinyi baraan. Nakripap um ta nunekap mupe wosik abom ihih nyumneh um.

²⁶ Eik yenekumepogu baraan apudok shup um iwerehumesh baraan eshudok arpesh douk shakri shunek rohwmep pugipesh kupainyi baraan iri. ²⁷ Aria ipak douk Kraiis nakepari Iruhin ananin Mishin nyawishep aria douk nyapenyep. Aria ta mare enesh arpesh shiyabigep um pudukemesh um enesh eshudok eneshenesh, uwok. Iruhin ananin Mishin ta nyiyabigep ihishmorim eshudok. Aria enyudok baraan douk enyen nyeyabigep-enyi, enyen douk adurin atin abom. Madae rohwin uwe. Namudok aria ipak pugipesh enyenyin baraan abom aria putukur Kraiis pupe dodogowip atip.

²⁸ Ipak eikish arpesh douk pape kabi eikish batowishumori, douk ipak putukur abom Kraiis pupe namudok. Um ahudok nyumnah anan nukri nutogur yopugunumahi, apak ta dodogowip mupe. Ta mare abraen nyop

aria munogugur mukri munak munabeshukuk um anan, uwok. ²⁹ Ipak douk wosik padukemesh um Kraiss anan douk yopuni arman abom. Namudok aria ipak douk pudukemesh namudok. Ihishmorim arpesh shunek yopinyi atin iri, eshesh douk shatogur Iruhin ananish batowish abom.

3

Douk Apak Mape Iruhin Ananish Batowish

¹ Yaipo, ipak ta pure urkwip aria punek urkwip um agundok douk Iruhin anan urkum munawasham apak abom um. Ananim urkum manawasham apak abom aria douk nahwarap ananish batowish. Namudok aria adur atin, apak douk Iruhin ananish batowish. Agundok atapishi arpesh douk madae shudukemesh um apak uwe, uwok. Umum mares, eshesh madae shudukemesh um Iruhin uwe. ² Eikish arpesh, douk apak mape Iruhin ananish batowish. Aria Iruhin douk watak neyabigap um agundok kweipon ta mupe mumam abom um uwe, watak. Aria apak douk madukemesh um abudok nyutob Kraiss nutogur obi nyutob, apak ta mutogur mupe kabi anan um. Um mares? Apak ta mutrun wosik abom kabi anan nape abom um. ³ Aria ihishmorim arpesh apa shape shatrugun um Kraiss iri, eshesh apa shanagapesh um eshesh kanak aria shape yopiyopishi meyoh abom kabi Kraiss anan yopuyopuni abom um.

⁴ Enyudok arpen nyenek yoweishi inahos iri, enyen douk nyabrig Iruhin ananin lo. Um mares? Agundok shenek yoweishi inahos um douk baugos abom um shabrig Iruhin ananin lo um. ⁵ Ipak padukemesh. Kraiss douk natogur nator apak aria nenek Iruhin madae nunasuhwesh nupe um yoweishi inahos apak menekesh iri uwe, uwok. Anan Kraiss douk madae enesh yoweishi

inahos abom shupenyan uwe, uwok meyoh. ⁶ Namudok aria eshudok arpesh douk shatukur Kraisi iri, eshesh douk madae shupe um shunek yoweishi inahos namudok atin uwe, uwok. Aria eshudok douk shapeum shenek yoweishi inahos iri, eshesh douk madae shutik Kraisi o shudukeman uwe, uwok.

⁷ Ipak eikish arpesh douk patogur kabi eikish batowish-umori, ipak gamo pudukemesh. Ta enen arpen nyunek rohwmep aria pugipeshuk kupainyi baraan. Arpesh shapeum shenek yopinyi atin iri, eshesh douk yopishi abom kabi Kraisi anan yopuni abom um. ⁸ Seiwok wata sagomatin Satan nenek yoweishi inahos. Namudok aria eshudok arpesh douk shapeum shenek yoweishi inahos namudok atin iri, eshesh douk Satan ananish arpesh. Aria baugenyum um baraan um agundok Iruhin ananin Nuganin natogurum, anan douk natogurum nununu Satan ananin yoweinyi mour. ⁹ Enyudok arpen douk nyatogur Iruhin ananin batowin iri, enyen douk madae nyupe um nyunek yoweishi inahos namudok atin uwe, uwok. Um maresh? Enyen douk ehudok Iruhin ananin aih abom hapenyan iri. Enyenyin Yaken douk Iruhin aria ta mare nyupe um nyunek yoweishi inahos namudok atin, uwok. ¹⁰ Aria apak mukri mudukemesh um Iruhin ananish arpesh meishi aria Satan ananish meishi um, apak ta mudukemesh namudok. Arpen douk madae nyunek yopihi aih iri uwe o enyen madae urkum munawasham enyenyinyi arpen iri uwe, enyen douk madae Iruhin ananin batowin uwe, uwok.

Apak Atin Atin Ta Urkwip Punawasham Abom Kupaishi Arpesh

¹¹ Riguk wata sagomatin douk pemneken enyudok baraan. Baraan enyudok. Apak atin atin ta urkwip punawasham abom kupaishi. ¹² Apak mare mudukem

anudok arman Kein, uwok. Anan douk Satan ananin Nuganin aria nabo ananin wanin nagok. Anan Kein ananin mour douk yoweinyi. Aria ananin wanin Abel ananin mour douk yopinyi. Namudok aria douk nan nagok.

¹³ Namudok aria eikish arpesh, ta agundok atapishi arpesh shukri uwok-umep aria shukep agabus um, ipak douk mare mishish shikitak yowiyokuk, uwok. ¹⁴ Apak douk wosik urkwip panawasham apakishi arpesh. Namudok aria madukemesh um apak makutukuk ahudok shagok-ahi yah aria matogur ahudok anah douk shape wosik abom ihih nyumneh um. Enyudok arpen douk enyenyim urkum madae munawasham enyenyishi arpesh iri uwe, enyen douk watak nyape ahudok shagok-ahi yah. ¹⁵ Enyudok arpen douk nyutik nabes yowes um enen enyenyin arpen iri, enyen douk kabi nyaen nyagok abom um. Aria ipak douk padukemesh. Arpen nyabo kupainyi nyagok iri, enyen douk madae nyurao okwudok outuk um ta nyupe wosik ihih nyumneh um nyupenyok uwe, uwok.

¹⁶ Jisas douk nagok um nutaurum apak. Douk namudok aria apak madukemesh um agundok apakip urkwip punawasham arpesh um. Aria apak douk shopunek mukri wosik abom um kupaishi shop mugok um nutaurum apakishi arpesh. ¹⁷ Aria ta enen arpen nyunosuh sabaishi eneshenesh agundok atapishi eshudok, aria enyudok arpen nyutik enen enyenyin yaruhin arpen um eshudok aria madae nyukri giha-umen um uwe, enyen douk mare nyukri enyen urkum munawasham Iruhin, uwok. Enyen douk nyenek roh. ¹⁸ Eikish batowish, apak madae mukri urkwip punawasham arpesh um agundok miyagwreh wehinyi baraen atin um, uwok. Apak mukri apakip urkwip panawasham arpesh um, namudok douk munekumesh abom yopihi aih o mour.

Iruhin Ananish Arpesh Douk Madae Shunogugur Um Shunak Hurukatin Um Anan Uwe, Uwok

¹⁹ Munekesh namudok um agundok apakip urkwip punawasham apakishi arpesh um, namudok ta mudukemesh mukri apak adur madukemesh um adurinyi baraeen magipeshen. Munekesh namudok aria apakish mishish ta yopiyopish mupe dodogowip abudok nyutob apak munek beten munak hurukatin um anan obi nyutob. ²⁰ Aria abudok nyutob apakip urkwip purum enesh apak menekesh iri yoweishi inahos um, aria apak ta mudukemesh abom namudok. Anan douk debeini abom neshagrakuk apakip urkwip nadukemesh abom um eneshenesh. ²¹ Namudok aria eikish arpesh, ta apakip urkwip mare purum eshudok yoweishi inahos douk apak menekesh iri aria mare mukri apak yoweipi um, namudok douk meyotu dodogowip atop abom manak hurukatin um anan. ²² Aria apak mukri munek beten morigan um enesh eshudok eneshenesh um, anan ta nukapesh. Um maresh? Apak douk magipesh ananin lo munek enenyenen anan nakri-enyi. ²³ Ananin lo douk enyudok. Apak munek bilip abom um ananin Nuganin Jisas Kraisa aria urkwip punawasham apakish atin atin arpesh. Munekesh kabi Kraisa nakripap dodogowinyi baraeen um. ²⁴ Aria enen arpen nyugipesh Iruhin ananin lo um, enyen douk nyape Iruhin aria anan nape enyen. Iruhin douk nakapari ananin Mishin aria enyen nyataurumap madukemesh um Iruhin douk nape apak.

4

Arpesh Douk Iruhin ananin Mishin Nyapenyesh Iri Shani Eshudok Enesh Nyenek Rohwumesh Iri Mishin Nyapenyesh Iri

¹ Eikish arpesh, sabaimi henek rohwmesh iri profet douk hape harahe hanak ihigunum agundok atap.

Namudok aria ipak mare punek bilip um ihim-morim profet douk hukri amam douk Iruhin ananin Mishin nyapenyam iri, uwok. Aria ipak punek skelimam ihim-morim um pudukemesh um amam adur Iruhin ananin Mishin nyapenyam o enen kupainyi. ² Pakri pudukemesh um Iruhin ananin Mishin um, ipak douk ta pudukemesh namudok. Ihishmorim arpesh ta shukri, “Jisas Krais douk natogur adurin arpen.” Arpesh shukri namudok iri douk Iruhin ananin Mishin nyapenyesh. ³ Aria ihishmorim arpesh douk shakenyuk agabus enyudok baraeen um Jisas iri, eshesh douk madae Iruhin ananin Mishin nyupenyesh uwe, uwok. Eshesh douk kupainyi mishin nyapenyesh. Enyudok kupainyi mishin douk Krais ananin horin ananin. Anan douk pemnek baraeen um ta nunaki iri. Aria douk natogur nape agundok atap.

⁴ Aria ipak eikish arpesh, ipak douk pape Iruhin ananip. Aria ipak douk pam habuhuk amudok rohwiwi profet. Um maresh? Enyudok nyapenyep iri Mishin douk dodogowin atin abom nyabouk enyudok enen mishin nyape agundok atapishi arpesh iri nyabuhuk. ⁵ Amudok armam, amam douk agundok atapimi meyoh. Namudok aria amam douk hapeum heyagwreh um agundok atapishi eneshenesh atish. Heyagwreh aria agundok atapishi arpesh shemnek amamin baraeen. ⁶ Aria apak douk Iruhin ananip. Eshudok arpesh shadukemesh um Iruhin iri, eshesh douk shemnek apakin baraeen. Aria eshudok madae Iruhin ananish iri uwe, eshesh douk madae shumneken atin uwe apakin baraeen, uwok. Aria yah douk ahudok, um mudukemesh um enyudok Iruhin ananin Mishin douk nyape um nyeyagwreh adurin atin baraeen iri meinyi aria enyudok enen nyape um nyenek rohwmesh iri mishin meinyi um.

Iruhin Anan Urkum Manawasham Apak Abom

⁷ Eikish arpes, apak atin atin ta urkwip punawasham apak kanak abom um. Um maresh? Ehudok aih um urkwip panawasham kupaishi um douk Iruhin ananish abom um. Arpes urkwip punawasham kupaishi iri, eshesh douk Iruhin ananish batowish abom. Aria eshesh douk shadukeman wosik abom Iruhin. ⁸ Iruhin anan douk baugos um agundok urkwip panawasham kupaishi um. Namudok aria meinyi arpen douk enyen madae urkum munawasham enyenyish arpes iri uwe, enyen douk madae nyudukem Iruhin uwe, uwok. ⁹ Namudok aria Iruhin neyabigap um agundok anan urkum manawasham apak abom um. Neyabigap namudok. Anan douk atun nuganin meyoh. Aria neshopokan nanakumori agundok atap um nutaurumap muraokwudok outuk um mupe wosik abom ihih nyumneh um.

¹⁰ Baugos um agundok Iruhin ananim urkum manawashamap um douk namudok. Apak madae murik urkwip punawasham Iruhin uwe, uwok. Aria douk anan narik urkum manawasham apak aria neshopoki ananin Nuganin nanaki nataurumap. Nataurumap nagok aria nenek Iruhin madae juwehosin um apak aria nukri um nunasuhwesh nupe um yoweishi inahos apak menekesh iri uwe, uwok nakwreyeshuk. ¹¹ O eikish arpes, enyudok mour abom um Iruhin neshopoki ananin nuganin nanaki neneken um nutaurum apak um, enyen douk nyeyabigap abom um agundok Iruhin anan urkum manawashamap abom um. Namudok aria apak ihishmorim atin atin shopunek apak urkwip ta punawasham ihishmorim abom um. ¹² Madae enen arpen nyutik Iruhin uwe, uwok. Aria apak ihishmorim atin atin apak urkwip punawasham ihishmorim abom um, Iruhin ta nupe apak atin atin abom. Namudok aria ehudok ananish aih um urkwip panawasham um kupaishi um ta hutogur dodogowih

abom um apak.

¹³ Anan douk nakop ananin Mishin nyapenyap. Namudok aria madukemesh um, apak douk mani anan Iruhin mape aria anan shopunek nani apak mape. ¹⁴ Yain Iruhin neshopoki ananin Nuganin nanaki aria nataurum apak ihishmorim mape agundok atap iri narap matanamori mape wosik atin abom. Apak matik namudok aria douk makrip arpesk enyudok baraen. ¹⁵ Aria enen arpen nyukri Jisas anan douk Iruhin ananin Nuganin um, enyen douk nyani Iruhin nyape aria Iruhin nani enyen nape. ¹⁶ Aria apak kanak douk madukemesh um agundok Iruhin anan urkum manawashamap abom um. Madukemesh aria munek bilip makri adur um anan douk urkum manawashamap abom.

Iruhin anan douk baugos abom um agundok urkwip punawasham kupaishi um. Namudok aria shashudok arpesk douk shupe um urkwip punawasham kupaishi iri, eshesh douk shape Iruhin aria Iruhin nape eshesh. ¹⁷ Baugenyum um baraen um agundok Iruhin nuhur apakip urkwip aria panawasham abom apakish arpesk um, douk um apak ta mare munogugur ahudok nyumnah debeiti kwot tunenek-ahi. Um maresh? Apak wata mape agundok atap obi nyutob, apak douk madukem Kraiss abom. Namudok aria apak ta mare munogugur, uwok. ¹⁸ Arpen douk enyenyim urkum manawasham abom enyenyishi arpesk shani Iruhin wosik iri, enyen douk madae nyunogugur atin uwe, uwok. Aria ehudok aih hutogur dodogowih atih um, enyen douk ta nyihyahuk agundok shanogugur um. Baugos um agundok arpesk shanogugur um douk namudok. Shanogugur um Iruhin nunekumesh kwotog um esheshish yoweishi inahos aria nunekesh shurao debeiri eriger. Aria arpen douk nyanogugur iri, enyen douk madae dodogowin abom um

urkum munawasham Iruhin nini enyenyish arpesh uwe, uwok.

¹⁹ Iruhin anan narik urkum manawasham apak. Namudok aria douk, apak shopunek wata urkwip panawasham anan nani apakish arpesh. ²⁰ Aria enen arpen nyukri enyen urkum manawasham Iruhin, aria enyen douk nyekenyuk agab enen enyenyinyi arpen um, enyen douk nyenek rohw. Aria enyen urkum madae munawasham enyudok arpen douk nyatrin abom enyenyis nabes iri um uwe, namudok enyen ta urkum munawasham Iruhin mumam, douk enyen madae nyutrung enyenyis nabes iri uwe? Uwok meyoh. Enyen douk nyenek rohw abom. ²¹ Lo douk Kraish nakopen iri enyudok. Meinyi arpen douk enyenyim urkum munawasham Iruhin iri, namudok atin enyenyim urkum ta munawasham enyenyish arpesh shopunek.

5

Iruhin Ananish Arpesh Douk Dodogowish Abom Um Shubouk Agundok Atapihi Yoweih Aih Hubuhuk

¹ Ihishmorim arpesh douk shunek bilip shukri Jisas anan Kraish, douk Iruhin nagraehan aria neshopokan nanakumori nunarao arpesh iri um, eshudokmori arpesh douk shape Iruhin ananish batowish abom. Ihish arpesh douk esheship urkwip panawasham anan yaken iri, eshesh douk shopunek apa urkwip panawasham ananin batowin shopunek. ² Aria apak urkwip punawasham Iruhin aria mugipesh ananin lo um, namudok douk mudukemesh mukri apakip urkwip adur panawasham ananish batowish abom shopunek. ³ Baugos um agundok apakip urkwip punawasham Iruhin um douk namudok. Apak magipesh ananin lo. Aria ananin lo douk madae debeinyi mour abom um apak mugipeshen um

uwe, uwok. ⁴ Um maresh? Ihishmorim arpesh shape Iruhin ananish batowish iri douk wosik dodogowish shabo agundok atapihi yoweih aih habuhuk. Baugos um apak munek uhwinyum ahwudok wanohw, um mubo enesh-enesh agundok atapishi yoweishi inahos shubuhuk um douk namudok. Apak musuhw Iruhin ananin baraan dodog aria mugipeshen wosik. ⁵ Meishi arpesh ta wosik dodogowish um shubouk agundok atapihi yoweih aih hubuhuk? Eshudok arpesh douk eshudok shunek bilip shukri Jisas anan douk Iruhin ananin Nuganin iri atish.

Iruhin Nakripap Baraen Um Gamo Mudukemesh Abom Um Ananin Nuganin

⁶ Jisas Kraiss douk anudok arman abom douk nanaki agundok atap iri. Nanaki nenek baptais arigaha aria shan nagok ananibor owishibor bau babuhi atap. Anan douk madae nunakumori agundok nunek baptais abar atubor um uwe, uwok. Aria douk nanakumori nunek baptais aria shon nugok owishibor butourak buh bubuhi atap shopunek. Iruhin ananin Mishin douk nyape um nyeyagwreh adurin atin baraan iri, enyen douk nyakripap nyakri enyudok baraan douk adurin. Enyudok baraan um Kraiss nenek baptais aria eshesh shan nagok um. ⁷⁻⁸ Biyesh atin eshudok douk shawereh abom baugenyum um enyudok adurin atinyi baraan um Kraiss. Eshesh douk eshudok. Iruhin ananin Mishin nyani abar iri owishibor. Eshesh douk shakri abom atin baraan. ⁹ Apak douk memnek baraan arpesh shakripap-enyi aria munek bilipumen. Aria baraan douk Iruhin nakripap-enyi douk dedeben atin abom nyeshagrakuk arpesh shakripap enyi. Aria enyudok Iruhin nakripap-enyi baraan, anan douk nakripap enyudok baraan um ananin Nuganin. ¹⁰ Namudok aria eshudok

arpesh douk shapeum shenek bilip um Iruhin ananin Nuganin iri, eshesh douk sharao enyudok Iruhin nakripap-enyi adurinyi barae nyape esheshiruh aparuh. Aria eshudok arpesh douk madae shunek bilip um Iruhin iri uwe, eshesh douk shahwar Iruhin shakri napeum nenek rohwa atin iri. Um maresh, eshesh douk madae shunek bilip um enyudok barae uwe, douk Iruhin nakripap um ananin Nuganin um, uwok. ¹¹ Aria enyudok adurinyi barae douk Iruhin nakripap-enyi douk enyudok. Iruhin douk nenekap um mupe wosik abom ihih nyumneh. Aria baugos um agundok mupe wosik ihih nyumneh um douk nyape um ananin Nuganin atun. ¹² Meinyi arpen douk nyutukur ananin Nuganin iri, enyen douk ta nyupe wosik abom ihih nyumneh. Aria arpen douk madae nyutukur Iruhin ananin Nuganin iri uwe, enyen ta uwok meyoh.

Iruhin Nenekap Um Mupe Wosik Abom Ihih Nyumneh

¹³ Eik yenekumepogu enyudok barae ipak douk penek bilip um Iruhin ananin nyeigur iri. Yenekenyumagu yakri ipak putrin aria pudukemesh um, ipak Iruhin douk nenekep um pupe wosik abom ihih nyumneh. ¹⁴ Aria apak mugipesh enenyenen Iruhin ananim urkum makriyen iri atin aria munek beten morigan um enesh eshudok eneshenesh um, anan ta numnek apakin beten. Namudok aria abudok nyutob munak abom hurukatin um anan aria munek beten obi nyutob, apak douk ta dodogowip aria mare munogugur um anan, uwok. ¹⁵ Aria apak madukemesh um anan apa nemnek ihinmorim beten apak marigan um. Namudok aria apak douk mudukemesh um enyudok. Abudok nyutob munek beten morigan um nukop enesh eshudok eneshenesh obi nyutob, apak ta munare urkwip mukri eshudok munek beten marigan-umesh iri douk adur kabi nakopesh masuhwesh um.

¹⁶ Aria enen arpen nyutik enen enenyin arpen nyunek enesh yoweishi inahos douk madae wosik um shuneken nyunak um yoweiburi wabur um nyugok abom um uwe, enyudok arpen ta nyunek beten nyorik Iruhin um nuta-
 taurum enyudok nyenek yoweishi inahos iri, um enyen nyupe wosik abom ihih nyumneh. Enyudok baraen douk yakriyen um eshudok arpesk douk shenek eshudok yoweishi inahos douk madae wosik um shunekesh shunak yoweiburi wabur um shugok abom iri uwe. Aria enesh arpesk shenekesh iri yoweishi inahos, eshesh adur ta shunekesh shunak um yoweiburi wabur um shugok abom. Aria eik douk madae ikri um punek beten um eshudok-mori arpesk uwe, uwok. ¹⁷ Ihihmorim madae yopihi aih iri uwe, Iruhin douk natrih nakri yoweishi inahos. Aria enesh arpesk shenekesh iri yoweishi inahos, eshesh douk madae wosik um shunek arpesk shunak yoweiburi wabur uwe, uwok.

¹⁸ Apak douk madukemesh. Eshudok arpesk douk shape Iruhin ananish batowish iri, eshesh douk madae shupe um shunek yoweishi inahos namudok atin uwe, uwok. Um maresh? Iruhin ananin Nuganin narokarubesh shape wosik aria yoweini Satan ta nubirak aria mare nunekumesh enesh yoweishi inahos, uwok. ¹⁹ Apak douk madukemesh. Apak douk mape Iruhin ananish batowish aria Satan douk nape debeini um ihishmorim shape shagipesh agundok atapihi atih aih iri. ²⁰ Aria apak douk madukemesh. Iruhin ananin Nuganin douk nanaki neyabigap madukemesh um anudok adurin Iruhin. Apak douk matukur anudok adurin Iruhin aria matukur ananin Nuganin Jisas Krai. Jisas Krai anan douk adurini Iruhin. Anan douk baugos um agundok apak mupe wosik abom ihih nyumneh um.

²¹ Eikish arpesk douk pape kabi eikish batowish-umori,

1 JON 5:21

19

1 JON 5:21

eik yakri ipak pukomuk agabus abom ihim madae adurim
iri uwe god omi.

IRUHING ANANIN BARAEN
The New Testament in the Coastal Arapesh dialect of the
Bukiyip language of Papua New Guinea
Nupela Testemen long tokples Coastal Arapesh long Niugini

copyright © 2003 Wycliffe Bible Translators, Inc.

Language: Coastal Arapesh (Bukiyip)

Dialect: Central

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-07

PDF generated using Haiola and XeLaTeX on 19 Oct 2021 from source files dated 17 Oct 2021

d1ef5a4e-3e53-5ef0-80e4-4cd8770ca6e6